

# Vertroue isch guet

Kontroue besser



Komödie in  
drei Akten

von Christine Mader

# Vertroue isch guet, Kontroue besser

Komödie

Dauer ca. 70 Minuten

Marie-Luise Grob	Freundin von Helga	60 Jährige, die mit ihrer Freundin Wellnessferien macht.
Simon Grob (MATHILDE)	ihr Ehemann	er und sein Freund finden es etwas komisch, dass die Frauen alleine in die Ferien verreisen wollen. Verkleidet spioniert er den beiden nach.
Helga Zurbuchen	Freundin von Marie-Luise	60 Jährige, die mit ihrer Freundin Wellnessferien macht.
Alois Zurbuchen (ADELE)	ihr Ehemann	er und sein Freund finden es etwas komisch, dass die Frauen alleine in die Ferien verreisen wollen. Verkleidet spioniert er den beiden nach.
Angelika Bühler	Gast	reiche jüngere Frau, die erst nach der Heirat bemerkt, dass ihr Ehemann sie nur wegen ihrer Schönheit geheiratet hat. Nun reist sie ihrem Geliebten nach, der hier im Wellnesshotel als Fitnesstrainer tätig ist
Vanessa Hirschi	Fitnesstrainerin	junge Fitnesstrainerin
Alberto Casutt	Fitnesstrainer	gut aussehender Fitnesstrainer, der nur Augen für Angelika hat
Franz Gugger	Gast	etwas linkischer, nicht gerade beliebter Gast
Kurt Imhof	Inhaber Hotel Alpina	älterer Mann
Jonny Brown	Detektiv	Mann im bestem Alter, der als Tarnung mit einem englischen oder französischen Unterton spricht
Aerobicgruppe		Sportliche Gäste des Hotels

Spielort: alle drei Akte spielen vor dem Hotel

	<b>1. Akt</b>
Marie-Luise	Eh, wie schön isch das da. Helga, das Hoteu hautet, was dr Prospäkt versproche het.
Helga	Ja, du hesch rächt. D Gäget hie isch würtlech wunderschön. Da chö mir de würtlech üses Walking-Training gniesse. I hoffe nume, es göng de nid di ganz Zyt obsi.
Marie-Luise	Lue dert hinger di Ligistüeu. Da fröie i mi druf, einisch richtig dörfe z plöischle, z walke u z Nüt tue zgniesse. I hoffe nume, mir heige de o no chli nätti Gseuschaft.
Helga	He ja, so nä junge, hübsche Walkingtrainer wär scho nid z verachte.
Marie-Luise	<i>(lachend)</i> Ja, da hesch rächt, das wär super, we mir üs ä chli chönnte amüsiere. Aber i bi überzügt, dass i trotz de vile Jahr, wo ig mit mim Maa ghürate bi, nüt angers wett. Er isch doch eifach dr Bescht. So chumm, mir gö mau zur Reception.
	<b>Einen Tag später</b>
	<i>Eine Turngruppe kommt zum Vorschein und sie machen Aeorbic. Hinter dem Gebüsch sind Alois und Simon zu sehen</i>
Simon	Lue amau Alois, das isch sech schon nume wäg dene schöne Froue derwärt gsy, dahäre z cho.
Alois	Ja, da hesch rächt. So lue jetzt geits de los. 1, 2, 3..., nid schlächt wie das usgseht.
Simon	He, lue dert chöme üsi Froue derhär. Was hei si äch im Sinn.
Alois	Nei, das gits ja nid, lue sie si i Begleitig vo mene flotte junge Maa. I luege de das nid lang mit a, we mi Frou sött...
Simon	Jetzt tue doch nid grad düreträje, i gloube eifach nid, dass üsi Froue würde frömd ga.
Alois	<i>(pst...)</i>
Alberto	So, dir zwo hübsche Froue, mir setze üs grad da häre, de chö mir i auer Rüh ds Programm bespräche.
Simon	Ggesch, äs isch ja numme dr Trainer...
Marie-Luise	Danke, Alberto. Eh wie hei mir das guet preicht,

	dass üs so ne nätte Fitnessstrainer d Ferie versüesst.
Helga	Ja, Herr Alberto, mir sy de scho überglücklech über öji Bekanntschaft.
Alois	<i>(nei so öppis, ts, ts...)</i>
Marie-Luise	Hesch scho rächt, aber mit so mene nätte Leiter mache sicher o strängi Toure e Heidespass.
Alberto	Ja, ja isch scho guet. Auso lueget hütt am eis mache mer üsi erschti Tour. Zersch tüe mir no chli d Technik aluege u de geits de los. Dert dr Grat z düruf u de äne übere Hubu wieder zrüg.
Helga	Aber Alberto, de nid grad z gäi, mir wette ja de hie no chly Ferie mache u nid nume Schwärschtarbeit leischte, das chöi mir daheime gnue.
Simon	Stärneföifi, auso jetz überchume o ig Problem. Das darf doch nid wahr sy. Chuum ä Tag sy die zwo da, u scho hei si sech ä schöne Maa aglachtet u benäh sech ihm gägenüber derewäg. Das chas doch nid sy.
Alois	Gsesch, de isch es doch guet, dass mir zwe sy dahäre cho, für dass mir grad chö gseh was da so louft. Es isch mir ja vo Afang a gspässig vor choo, dass my Frou unbedingt die Walking-Wuuche hie obe het wöue verbringe.
Alberto	Auso, dir zwo Schöne, we aues klar isch, de gan i jetz, i ha no viel ztüe.
Helga	Ja, danke Alberto, bis hütt Namittag.
Marie-Luise	I fröie mi, auso bis am Eis.
Alberto	Adiö zäme... <i>(ab)</i>
Simon	Du hesch rächt, mir müesse dene Froue würklech uf d Finger luege. Aber wie wie mir das o nume mache, ohni dass sie üs gseh?
Alois	He, mir isch grad so ne Idee cho. Chuum mir gö i hinger Teil vom Park, dass mer nid öppe entdeckt wärde, u de tue ig dir mi Vorschlag ungerbreite. <i>(ab)</i>
Simon	Auso guet. <i>(ab)</i>
Marie-Luise	Du, mir heis würklich guet preicht, äs isch hie wunderschön. Es isch würklech super, dass mir das hei zwägbrunge, so ne Wuuche Ferie ohni Koche, Wösche, Putze, Glette ...

Helga	Du hesch rächt, gniesse mir hie die Tage i voue Züg.
Angelika	Grüessech mitenang. Darf i mi chly zu öich setze? I bi ersch grad achoo u wett gärn chli nöji Bekanntschafte mache. I bi d Angelika Bühler us Bärn.
Helga	Grüessech, i bi d Helga Zurbuchen vor Gohl u das da isch d Marie-Luise Grob vom Frittebach. Bisch du ganz alleini da? I darf doch „du“ säge, oder?
Angelika	Ja, äs fröit mi. I bi no nid so lang ghürate. Mi Ma isch Diräkter bi me ne grosse Phramakonzärn müesst dr wüesse, u i ha ersch nam Hochzyt gmerkt, dass är mi nume wäge mim Usgseh gno het, für dass er mit mir cha repräsentiere, aber dass ig ihm aus Mösch glichgültig bi. I muess di Sach ä chli verwärche u i ha mir däicht, das göng villedch i dere Umgäbig u bim Sport tribe ä chli ringer.
Helga	Eh wie tuet mir das leid. Ja hoffe, dass dir das glingt.
Marie-Luise	Chunsch hüt am eis o uf die Walkingtour mit em Alberto?
Angelika	Ja, i ha mi o igschribe. (zu sich selber) Nid unbedingt wägem Walking, aber wägem Alberto... Auso, bis später, i fröie mi uf öji Gseuschaft. (ab)
Marie-Luise	Glichfaus. Auso, bis später.
Helga	Tschou.
Marie-Luise	Oh, die Frou duuret mi. So ne nätti. Ja, i däiche mir wüsse scho nid, was mir a üsne Manne hei. O we sie zwüsche düre o ihrer Mugge hei, aber so öppis miech de mine scho nie.
Helga	Ja, da muess i dir rächt gä. I bi ja doch mit mim Alois im Augemeine o z friede.
Aerobicgruppe	<i>(erscheint im Vordergrund und beginnt zu turnen).</i>
Helga	Die si de würklech nid schlächt zwäg. Aber i ma mi de nid derewä abplage. Bös ha, das chöi mir de daheime ume, nid wahr Marie-Luise.
Marie-Luise	Ja, du hesch rächt. Aber so zum zueluege ischs scho cheibe spannend. O wie schön wärs doch, we me so bewegelech und guet zwäg wär, u de ersch no so no Poschtur hät, wie die.

Helga	Marie-Luise, chuunsch o mit, i wett dert di Ligistüeu no ga usprobiere. Die sötte doch nid so läär im Züüg ume staa. Mir sött doch geng liige we me d Glägeheit derzu het.
Marie-Luise	Ja, hesch rächt, i ha nämlech no äs interessants Buech mitgno, das wett i de scho fertig läse. Daheim chumen i de sowiso ume nümme derzue. <i>(ab)</i>
Helga	Auso, guet. <i>(ab)</i>
Angelika	<i>(betritt die Terasse und setzt sich an einen Tisch)</i>
Alberto	<i>(betritt die Terasse und setzt sich zu Angelika)</i> Eh da bisch ja, mis Chäferli. Es isch so schön, dass du bisch da häre cho. Mir müesse eifach ufpasser, dass niemer merkt, dass mir üs necher kenne u du i mim Zimmer übernachtisch.
Angelika	Ja, aber bis jetz han i ömu no niemer chembersch entdeckt, so dass i müesst Angst ha, dass mi Maa öppis vo mim Doppuläbe erfahrt. Du, di zwo mituauterläche Froue si de schön uf di abfahre, da muess i ja bau iversüchtig wärde <i>(lacht)</i>
Alberto	So, hör doch uf. Du weisch ja, dass ig nume Ouge für di ha.
Angelika	Wie si mer verzeut hei, hesch hüt am eis ä Walking-Lektion. Chan ig äch da o mitmache?
Alberto	Säubschtverständläch. Bis jetz hei sech nämlech nume die zwo Ämmitauer-Froue agmäudet u i fröie mi natürlech scho, wenn i noch chli jungs Gmües um mi ume ha.
Angelika	<i>(lächelnd)</i> Du i verbitte mir das Wort Gmües..
Alberto	<i>(auf die Uhr schauend)</i> Oh, es isch ja scho bau eis, i muess ga wiu dr Kurs ja scho bau afaht.
Angelika	Auso, i ga mi no schnäu ga anders alege. <i>(steht auf, ruft ihm zu)</i> . Auso u mir chenne üs de nüt, verstange! <i>(ab)</i>
Marie-Luise	<i>(tritt aus dem Hotel)</i> So Helga, de wei mer eis luege, was dä super Trainer üs zwone no cha bibringe.
Helga	<i>(tritt aus dem Hotel)</i> Ja, i bi ganz ufgregt. E was tuet me doch nid aus für so ne nätte junge Walking-Trainer. Du geht mi Frisur no guet us?
Marie-Luise	Ja Helga, das isch si, <i>(lächelnd)</i> mi gub dir würklech nid viu meh aus zwänzgi.

Alberto	<i>(geht auf die beiden zu)</i> So, dir zwo Froue syt dir fit, für die erschti Lektion? Mir hei Glück, dass is ds Wätter so guet wott.
Helga	I fröie mi wie es Ching uf ä erschit Schueutag.
Alberto	Mir müesse no grad chli warte, es sött no ne Dame cho.
Simon	<i>(kommt auf das Hotel zu)</i>
Alois	<i>(kommt auf das Hotel zu)</i>
Marie-Luise	He Helga, lueg eis dert die zwo Froue wo chöme z loufe. Wo chömme äch die här. Settigi Voguschüchine.
Helga	Eh du min doch o, wen i so usgsäch, getrout i mi nid emau zum Huus us, vor luter Angst, dass i mit em ene Unghür verwächselt wurd.
Marie-Luise	Lue eis, wie die einti louft. We si de scho so i Stögelischueh wott umeloufe, de sött sis de scho chli chönne...
Helga	U de die Röck, wo di zwo ane hei. Mi nimmt scho wunger, was die da wei. Die si so doch würklech hie im fautsche Film.
Angelika	<i>(kommt zur Gruppe)</i> Grüessech mitenang, sorry, dass der heit uf mi müesse warte. Vo mir us chas los ga, Herr Fitnesstrainer?
Alberto	Auso de tüe mir emau chli iturne, dass mir nächhär chö afe loufe. Tüet nech chli verteile, dass mir besser Platz hei... so u jetz los <i>(beginnt Uebungen vorzumachen)</i> .
Helga	<i>(die immer etwas hinten nach ist)</i> Nid so schnäu Herr Fitnesstrainer, i bi ma nid nache...
Alberto	Nume ruehig, Frou Zurbuchen, es chunnt scho guet!
Alois	<i>(setzt sich auf einen Stuhl)</i> Lueg amau Simon, dert si ja üser zwo Stockänte. E u ds hübsche Frölein macht ja beim Walking o mit. Oh wi schad, ig ha ghoffet gha, dass sie de ir Aerobicgruppe isch, das isch doch dert wo mir de wei mitmache, oder?
Simon	Ja, so isch es. Hoffe mir, dass es de dert o hübschi Froue drunger het. Item ömu d Trainere wo mir gseh he, isch würklech ä Ougeschmous.
Alois	So, uf das Theater vom hüttige Tag ache bruuche ig jetz afe einisch äs Bier.

Simon	He, vergiss nid, dass mir ja jetz Froue sy, es macht sech de cheibe schlächt, we mir dured Bier suufe.
Alois	Ja, du hesch rächt, de gan i haut zwöi Münzete ga hole.
Simon	Spinnsch, Tee nimme ig numme, wenn i de würklech todkrank bi. Oh, a was me da aues muess däiche, we me sech wiiblech wott ufführe.
Alois	Auso, de haut zwöi Wasser, bisch iverstange ?
Simon	Mira, Wasser chan i zwar dehome o suufe. Für das müesst i nid da häre cho, u de no äxtra zahle.
Alois	<i>(ab)</i>
Alberto	<i>(beendet das Einturnen)</i> Auso, de fö mir üsi Tour a... <i>(ab)</i>
Marie-Louise	<i>(ab)</i>
Helga	<i>(ab)</i>
Angelika	<i>(ab)</i>
Alois	<i>(kehrt mit Mineralwasser zurück).</i>
Alois	Lue, jetz trabe sie dervo. Das hätt i o nid däicht, dass üser Froue bi so me ne Stockäntegschwader mitmache.
Simon	Ig o nid. Aber i hätt o nie im Troum dra däicht, dass mir zwe, aus Froue verchleidet uf ere Hoteuterasse hocke u Minerauwasser sufe. Nei so öppis gits doch eigentlich würklech nid.
Jonny	<i>(betritt die Terasse, spricht gebrochen Deutsch)</i> E was het das für zwo hübschi Froue da ueche verschlage. Darf i mi da bi öich niederla?
Simon	<i>(etwas verwirrt)</i> E, e, e ja säubverständlech, hocket nume ab.
Jonny	Danke, i b dr Jonny Brown, us Amerika.
Alois	<i>(der sich gefasst hat)</i> I bi dr Alois Zurbuchen
Simon	<i>(gibt ihm mit dem Ellenbogen einen Stoss),</i> d Adele Zurbuchen, wott sie säge, vo der Gohl. U i bi d Mathiude Grob vom Frittebach
Jonny	Fröit mi sehr, öich lehre z chenne. I ha scho Angst gha, dass i da obe no versuuri, aber sit ig öich da ha gseh hocke, bin i überzüg, dass es ä spannende Urloub wird.
Alois	<i>(dem das Gerede peinlich ist)</i> Em Jonny, äs tuet mir leid, aber mir müsse üs ga zwägmache, für dass mer de für ds Aerobic bereit sy. <i>(steht auf)</i>

Simon	Ja, i wünsche dir no ä schöne Tag. <i>(ab)</i>
Franz	<i>(setzt sich auf Bank)</i>
Jonny	<i>(zu sicher selber)</i> Das si würtlech zwe komeschi Vögu.
Kurt	<i>(betritt die Terasse)</i> Oh wie guet, dass ig di grad atriffe. Mir chömme die zwo Froue, wo da vori bi dir ghocket si chly komisch vor.
Jonny	Mir ischs genau glich gange, u i ha mir vorgno, die zwo chli necher unger d Lupe z nä.
Kurt	Ja, da wär i dir sehr dankbar. I ha mir scho bim Ichecke Gedanke gmacht, ob äch da öppis fuu syg. Aber bis jetz bin i no nid derzu choo, d Identitätscharte u d Adrässe z kontrolliere.
Jonny	Wär villecht no guet, we du das chönntisch. I wott mi dene uf au Fäu ä chli nechere u drum gan i jetz o i d Aerobic-Stung, o wes mir schuderhaft zwider isch, das dasume Gehüpfe.
Kurt	<i>(lächelnd)</i> Danke, dass du das uf di nimmsch. Auso de guet „Hupf“! <i>(ab)</i>
Jonny	Danke, chas bruuche. <i>(steht auf)</i> Oh, mir tuet scho jetz aues weh! <i>(steht auf und geht bei der Bank vorbei, auf welcher Franz Gugger sitzt)</i> . Eh lu da, dr Herr Gugger. Loset chömmet doch o mit i die Aerobic-Gruppe; es isch drum viu luschtiger, we mer es paari si.
Franz	O nei, das isch nüt für mi.
Jonny	Für mi doch o nid. Aber dir wärdet gseh, dass sech das sch nume wäg dere schöne Frou, wo das leitet lohnt. U de si de hütt ir Gruppe no zwo nöji Froue, wo mitmache. Chömmet, d Trainerhose heit dr ja anne, de chas losga.
Franz	Ja aber...
Jonny	Nüt da, chömet <i>(zieht ihn auf)</i>
Franz	Auso mira <i>(geht mit)</i>
Vanessa	Eh wi schön, dass dir zwe o mit machet! Ah, dert chöme jetz no die zwo nöie Froue. <i>(geht auf sie zu)</i>
Alois	Grüessech, schöni Frou, i bi dr, e d Adele. U wi isch öie währt Name?
Vanessa	I bin d Vanessa. We dir iverstange syt, säge mer enangere doch „du“.
Alois	Säubverständlech.

Simon	U i bi d Mathilde. Es fröit mi di lehre z chenne. ( <i>schüttelt ihr die Hand</i> )
Vanessa	Auso de wei mer losla. Dir tüet eifach das, won i euch vormache nachemache. ( <i>Musik an</i> ) Eis, zwöi, drü....
Alois	Oh je, das isch doch nüt für mi, wi söu i das o nume ushaute...
Vanessa	Aber Adele, was isch ömu o los, nid öppe scho der Weich usehäiche, chuum hei mer agfange..
Alois	( <i>ganz ausser Atem</i> ) Nei so öppis, warum tuet me sech das o nume a.
Simon	So hör uf mit däm Gjammer, du stecksch mi ja richtig a, so dass i o chuum me nache ma. I dere Gschwindigkeit da mit de Arme u Bei zable u darzue no die cheibe Chlepfmusig alose, das isch endgültig nüt für mi ( <i>macht Pause</i> )
Vanessa	So, Mathilde, gib no chli Gas, du wirsch doch wou nid scho wöue ufgä. Guet Herr Gugger, dir machet das ganz guet. Jonny, nid nalah, es chunnt de scho guet.
Alois	So jetzt isch fertig, i streike. Öppis settigs. U das söue Ferie sy. Nei ohni mi. ( <i>geht zur Bank und setzt sich</i> ).
Vanessa	Aber, aber, was syt dir o für Weicheier. Das cheibe Gjammer isch ja nid zum ushaute... ( <i>macht fleissig weiter</i> )
Simon	I ma o nümme, ohni mi, das isch doch eifach nüt für so auti Man.. eh Froueli... ( <i>setzt sich zu Alois</i> )
Vanessa	Auso, chömmet dir zwe, de mache mir no chli witer u zeige ne wies geit... ( <i>machen weiter</i> ). So u jetze mache mir no e Schlussrundi u zwar aui zäme!
Alois	Muess das sy?
Vanessa	Säubverständlech. E lue d Walkinggruppe chunnt o grad zrügg. Alberto, machet dir bi üser Schlussrundi o no grad mit, äso zum abgwanne.
Alberto	Klar, chömet Froue, los geits.
Helga	E du min, mues jetzt das o no si, i hätt eigentlech turnet gnue. Eh wie het me i dene Ferie aber o bös. Du Marie-Luise, we das üser Manne gsuche, wie mir hie chrapfe.
Marie-Louise	Säg mer nüt, u derzue hei mer doch gmeint, mir

	gönge dahäre, für ds verschnuufe u z Fulänze.
Vanessa	Auso los geits. <i>(beginnt vorzuturnen)</i> .
Simon	<i>(flüsternd)</i> We üser Froue üs nume nid erchenne.
Alois	Das gloube ig scho nid.
Simon	I hoffe, scho du heigsch rächt, das bruchti i de nid z ha, dass me da üsi Idendität würd entlarve.
Vanessa	So, dir zwo Braschtifroue, chönntet dir o no chli mitmache, lueget die angere hei de scho e toui Tour i de Bei, u mache trotzdem flissig mit.
Simon	He auso mira...
Alois	Das isch de ds erschte u ds letschte Mau, wo ig da mitgmacht ha...
Vanessa	Guet, auso de hei mirs gschafft.
Alois	U mir si o gschafft.
Vanessa	I wünsche öich no ä schöne Abe. Adiö mitenang
Alle	<i>(Verabschieden sich und gehen in verschiedene Richtungen davon.)</i>  <b>Vorhang</b>